

**DEKRETU GOVERNU N° 16/2017**

**12 Maiu**

**REGULAMENTU KONA-BÁ APREZENTASAUN KANDIDATURAS BA  
ELEISAUN DEPUTADUS PARLAMENTU NASIONAL NIAN**

Lei eleitoral ba Parlamentu Nasional nian, tuir ne'ebé maka hatúr iha Konstituisaun Repúblika hateten katak, partidus pulítikus, ida-idak ka iha koligasaun nia laran, bele prezenta listas kandidatus Deputadus ba Parlamentu Nasional ninian.

Tamba ne'e, normas jerais sira kona ba apresentasaun no admisaun kandidatura ba eleisaun deputadus ba Parlamentu Nasional ninian, tuir ne'ebé maka hatúr iha lei ne'ebé refere, tenki hetan definisaun ida ne'e detallada.

Ho ida ne'e, Governu dekreta, tuir saida maka hatúr iha artigu 77° husi Lei n° 6/2006, 28 Dezembru, altera tutuir malu husi Lei n° 6/2007, 31 Maiu, 7/2011, 22 Juñu, 1/2012, 13 Janeiru no n° 9/2017, 5 Maiu, atu hetan kbít nudar regulamentu, sira tuir mai ne'e:

**Kapítulu I  
Dispozisoins Jerais**

**Artigu 1°  
Ámbitu**

Regulamentu ida ne'e estabese normas kona-bá apresentasaun kandidaturas ba eleisaun Deputadus Parlamentu Nasional nain, nomós normas kontensiozas sira kona-bá faze ida ne'e ho prosesus eleitorais ida-idak.

**Kapítulu II  
Kandidaturas no nia rekezitus sira**

**Artigu 2°  
Elementus Identifikasaun**

Ba regulamentu ida ne'e nian, konsidera sira tuir mai ne'e nudar elementus identifikasaun:

- a) Naran kompletu;
- b) Data moris;
- c) Filiasan;
- d) Profisaun;
- e) Naturalidade;
- f) Munisípiu, Postus Administrativus, Rejiaun Administrativa Espesial Oekusi Ambeno, Suku no Aldeia hela-fatin;
- g) Númeru inskrisaun resenseamentu eleitoral nian.

**Artigu 3°  
Inelijibilidade**

Sira tuir mai ne'e labele eleitu ba ba tur iha Parlamentu Nasional:

- a) Prezidente Repúblika;
- b) Majistradus judisiais no Ministériu públika nian sira ne'ebé maka sei ativu hela iha sira nia knar;

- c) Diplomas kareira sira ne'ebé sei ativu hela iha sira nia knar;
- d) Membrus forsa de defeza Timor nian (FALINTIL-FDTL) ne'ebé sei ativu hela iha sira nia knar;
- e) Membrus pulísia ne'ebé sei ativu hela iha sira knar;
- f) Ministrus sira husi kualker relijiaun ka kultu;
- g) Membrus Komisaun Nasional Eleisoin sira, tuir mai sei temi deit naran CNE.

#### **Artigu 4º**

##### **Proponentes sira nia representantes**

1. Kuandu prezenta lista kandidatus, partidus pulítikus no koligasaun partidária sira sei reprezenta husi ema ne'ebé sira hatudu.
2. Hodi bele ható notifikasaun, tenki indika kedas representante sira nia morada no kontaktu telefóniku iha processu kandidatura nian.

#### **Kapítulu III**

##### **Prosesu apresentasaun kandidatura**

#### **Artigu 5º**

##### **Poder hodi prezenta kandidatura**

1. Kandidaturas sira sei prezenta husi partidus pulítikus, ida-idak ka iha koligasaun ho partidu seluk, basta maka rejistadu ona, no iha lista mos bele tau hotu sidadaun sira ne'ebé maka la afilia ba partidus sira ne'e.
2. Partidu ka koligasaun partidária sira labele prezenta lista kandidatus liu husi ida.
3. Labele iha kandidatu ida maka mosu iha lista liu husi ida, tamba halo nia sai inelijivel.
4. Iha momentu prezenta kandidatura, partidus pulítikus ka koligasaun partidária sira, tenki hatudu prova katak sira kumpri duni saida maka hatúr iha nº 2 husi artigu 7º, artigu 18º no nº 2 ho 4 husi artigu 19 Lei nº 3/2004, 14 abril nian, kona ba partidus pulítikus sira, no karik la kumpri sira nia kandidatura sei hetan rejeisaun.

#### **Artigu 6º**

##### **Koligasaun Partidária ba fins eleitorais**

1. Marka tiha data eleisaun nian, iha loron 20 (ruanulu) nia laran, partidu rua ka liu bele halo koligasaun ba fins eleitorais (koligasaun partidária) ho objetivo hodi prezenta lista únika ba eleisaun parlamentu nasional nian, tuir termos sira ne'ebé hatúr iha número sira tuir mai ne'e.
2. Halo koligasaun partidária ba fins eleitorais tenki obdese saida maka hatúr iha Lei Partidus Pulítikus nian, komunika kedas ba CNE, ho temi ida-idak nia naran, sigla, bandeira no emblema.
3. Elementus sira ne'ebé temi iha número anterior tenki transmite kedas liu husi CNE ba Sekretariadu Tékniku ba Administrasaun Eleitoral (STAE), ne'ebé sei divulga kedas liu husi Avizu ne'ebé publika iha Jornal Repúblika.

#### **Artigu 7º**

##### **Fatin no Prazu ba apresentasaun nian**

Lista kandidatus sira sei prezenta ba Supremu Tribunal Justisa (STJ), iha prazu loron tolunulu nia laran, konta husi data publikasaun iha Jornal Repúblika dekretu ida ne'ebé maka marka data eleisaun nian.

**Artigu 8°**  
**Rekezitús ba apresentasaun kandidatura**

1. Apresentasaun kandidatura konsiste husi entrega deklarasaun konjunta aseitasaun nian ne'ebé subskrita husi kandidatus hotu, ordena no identifika ho lolós nudar kandidatus efetivus ka kandidatus suplentes.
2. Iha deklarasaun ne'ebé maka temi iha número ida foin liu ba ne'e, kandidatus sira deklara katak aseita atu kandidata-an ba eleisaun deputadus Parlamentu Nasional nian, aseita kandidatura nia representante, no la afeta husi kualker inelijibilidade ida no la kandidata-an tan husi lista partidu seluk ka koligasaun partidária seluk nian ruma.
3. Iha deklarasaun konjunta kandidatura nian ne'e, sei tau hotu iha ne'ebá elementus identifíkasaun husi kandidatus hotu-hotu inklui kandidatura nia representante rasik, no sei tau mos kandidatu hotu-hotu nia asinatura.
4. Listas husi kandidatus efetivus no suplentes sira sei respeita regra ne'ebé prevé ona tuir lei katak tenki iha fetu ida ba kada kandidatu nain tolu.
5. Iha lista ne'ebé koligasaun partidária sira apresenta sei iha indikasaun kona bá partidu ida ne'ebé maka propoin kada kandidatu.
6. Representante husi partidu pulítiku ka koligasaun partidária sei apresenta dokumentus ba STJ, iha suporte papel ka elektróniku, kona bá listas kandidatura nian, atu nune'e bele halo verifikasaun ba iregularidades ba prosesu no elejibilidade kandidatus sira nian.

**Artigu 9°**  
**Admisaun kandidaturas**

1. Kuandu simu tia kandidaturas ona, STJ, hahú kedas halo verifikasaun ba iregularidade husi prosesu sira ne'e, autenticidade husi dokumentus sira no elijibilidade husi kandidatus sira, no ba ida ne'e, sei hetan apoiu husi STAE.
2. STAE sei halo verifikasaun identifíkasaun no inskrisaun iha baze dados eleitoral iha prazu máximu loron 2 (rua).
3. Depois halo verifikasaun lista, STAE sei hasai no hatutan ba STJ, áta verifikasaun listas ne'ebé apta ba admisaun.
4. Sei rejeita kandidatus sira ne'ebé maka inelejívéis.
5. Karik verifika iregularidades prosesuais, sei notifika kedas representante kandidatura para completa iha prazu loron 2 (rua) nia laran.
6. Desizaun atu admite ka rejeita sei ható husi STJ, iha prazu loron 10 (sanulu) konta husi momentu ne'ebé prazu apresentasaun kandidatura nian termina ona, abranje ba kandidatura hotu-hotu no sei notifika kedas ba sira nia representantes sira, ba CNE nomós ba STAE.

**Artigu 10°**  
**Publisidade ba Desizaun**

Iha loron ne'ebé maka fo sai desizaun ne'ebé temi iha nº 6 husi artigu anterior, STJ sei taka desizaun ne'e iha nia edifisiu nia odamatan.

**Artigu 11°**  
**Komunikasaun ba kandidaturas sira ne'ebé admite ona**

1. Relasaun/informasaun husi kandidatura sira ne'ebé admitidu ona sei envia kedas ba STAE.

2. STAE promove divulgasaun ba kandidatura sira ne'ebé admite ona, liu husi radiu nasional no meius komunikasaun sosial hotu-hotu, durante loron 3 (tolu) tutuir malu.

### **Artigu 12° Sorteiu listas**

1. Loron ida tuir mai depois de publika tia kandidatura sira ne'ebé admite lolos ona, presidente STJ sei halo sorteiu ba kandidaturas sira iha kandidatus no sira nia representante sira ne'ebé mai partisipa iha sorteiu ne'e nia oin, atu nune'e bele atribui ba sira, orden buletin votu, no sei elebora mos áta ida ba ida ne'e.
2. Realizasaun sorteiu no impresan boletin votus sei la implika admisaun ba kandidatura, no sei konsidera nudar laiha efeitu, liu-liu ba kandidatura sira ne'ebé maka rejeitada ona definitivamente.
3. Rezultadu husi sorteiu sei taka iha edifisiu STJ nia odamatan, no sei haruka mos kópia ida ba CNE ho STAE.

### **Artigu 13° Substituisaun ka dezisténsia husi kandidatus**

1. Bele simu, karik kualker kandidatu ruma hakarak dada-an sai husi lista, basta maka tenki halo liu husi deklarasaun ida ne'ebé nia rasik assina no rekuñese husi notáriu, no mezm nune'e, lista ne'ebé apresenta vale nafatin.
2. Kandidatu ne'ebé hakarak dada-an, nia rasik tenki komunika ba nia partidu pulítiku hodi bele informa CNE, ho kópia ida ba STAE.
3. Bele mos halo substituisaun ba kandidatu, tó loron ruanulu-resin-ida antes eleisaun, iha kazu sira tuir mai ne'e:
  - a. Eliminasan tamba julgamentu definitivu husi rekursu ne'ebé bazeia ba inelijibilidade;
  - b. Kandidatu rasik dada-an ka halo dezisténsia.
4. Iha kazu ne'ebé maka kandidatu ne'e mate ka moras ne'ebé maka determina katak nia fizika ka psíkika labele duni ona, sei halo substituisaun ba nia tó oras hitunulu-resin-rua antes eleisaun.
5. Substituisaun ne'e fakultativa, no substitutus sira sei mosu iha lista iha suplente ida ikus liu nia okos.

### **Artigu 14° Dezisténsia husi lista rasik**

Bele simu, karik lista tomak sei dada-an sai ka deziste, tó oras hitunulu-resin-rua husi loron eleisaun nian liu husi komunikasaun ne'ebé representante sei ható ba STJ, ne'ebe tuir mai sei transmite tutan ba CNE no ba STAE.

## **Kapítulu IV Dispozisaun kona kontensiozu apresentasaun kandidatura nian**

### **Artigu 15° Rekursu**

1. Ba desijaun ne'ebé maka foti kona bá apresentasaun kandidatura nian bele ható kedas rekursu ba koleтиву STJ iha prazu loron 1 (ida) nia laran.
2. Rekerimentu atu ható rekursu, tenki apresenta fundamentos no akompaña kedas ho provas.

3. Desijaun kona ba rekursu ne'e sei hasai iha loron 2 (rua) nia laran, konta husi momentu ne'ebé prazu ida temi iha número 1 ne'e remata.
4. Sei haruka kedas kandidatus sira ne'ebé admitida lolós ona nia relasaun/informasaun ba CNE no STAE.

### **Artigu 16º** **Lejitimidade**

Kandidatus, partidus pulitikus, koligasoins partidárias, representantes kandidaturas sira nomós eleitores sira iha lejitimidade atu apresenta rekursu.

### **Artigu 17º** **Desizaun**

STJ maka decide lolós kona ba rekursu iha prazu oras 48 (hatnulu-resin-walu) nia laran konta husi data ne'ebé simu autos ne'e, no sei komunika desijaun ne'e, iha loron ne'e duni, ba entidade ne'ebé maka husu rekursu,ba CNE no ba mós STAE.

## **Kapítulu V** **Dispozisoins finais no tranzitória**

### **Artigu 18º** **Kontajen no prazus nia termu**

1. Prazus sira ne'ebé maka prevé ona iha regulamentu ida ne'e sei kontinua nafatin.
2. Kuandu kualker átu ne'ebé temi iha regulamentu ida ne'e envolve intervensaun husi entidades ka servisu públikus, sei konsidera katak prazu ne'e remata kuandu horáriu expediente husi servisu públikus sira ne'e remata ona.

### **Artigu 19º** **Tribunal competente**

Enkuantu STJ sidauk hahú halao nia knar, kompeténsia sira ne'ebé maka nia hetan husi regulamentu ida ne'e sei ezerse husi Tribunal Rekursu.

### **Artigu 20º** **Kazus omisus**

Kazus omisus (ka kazus sira ne'ebé la prevé iha lei ida ne'e) sei rezolve tuir lejislasaun ne'ebé bele aplika ka konforme prinsipus jerais direitu nian.

### **Artigu 21º** **Formuláriu apresentasaun kandidatura nian**

1. Kandidaturas hotu-hotu sei apresenta liu husi prienxe formuláriu deklarasaun konjunta aseitasaun kandidatura nian, ne'ebé akompaña mos ho dokumentus sira ne'ebé prevé ona iha dekretu ida ne'e, perante STJ
2. Formuláriu ne'ebé maka temi iha número anterior, tau iha anexu I husi diploma ida ne'e ninian, nudar parte integrante ba efeitus legais hotu-hotu

**Artigu 22°**  
**Entrada en vigor**

Regulamentu ida ne'e sei hahú vigora iha loron ida tuir mai hafoin loron ne'ebé halo publikasaun iha Jornal Repúblika.

Aprova iha Konsellu Ministru iha 11 maio 2017.

Ba publika.

Primeiru Ministru,

**Dr. Rui Maria de Araújo**

Ministru Administrasaun Estatal,

**Dionísio Babo Soares, PhD**

Tradusaun La-Oficial